

Namminersorlutik suliffeqarfiutillit immiaaqqanik, viinninik imigassallu kimittuunik eqqussisinnaangornissaat anguniarlugu Nioqqutissanik eqqussuineq annissuinerlu pillugit Inatsisartut inatsisaat nr. 18, 30. oktober 1992-imeersumut Naalakkersuisut allannguutissatut siunnersuuteqarnissaanik peqquneqassasut Inatsisartut aalajangiiffigisassaattut siunnersuut.
(Inatsisartunut Ilaasortaq Jens-Frederik Nielsen, Demokraatit)

Akissuteqaat

(Aningaasaqarnermut Naligiissitaanermullu Naalakkersuisoq)

Siullermeerinnineq

Naalakkersuisut sinnerlugit siunnersuuteqartoq aalajangiiffigisassatut siunnersuuteqarnera qjaffigerusuppara.

Malittarisassat atuuttut naapertorlugit innuttaasut immiaaqqanik, viinninik imigassamillu ullumikkut piffimmi pisiniarfinni nioqqutigineqanngitsunik eqqussisinnaanermut killilersuiffigineqarput. Nioqqutissanik eqqussuisarneq annissuisarnerlu inatsit malillugu inuussutissarsiortut kisimik nioqqutissanik taakkuninnga eqqussisinnaanermut akuerineqarsinnaapput.

Siunnersuuteqartup Innuttaasut 18-t sinnerlugit ukiullit immiaaqqanik, viinninik imigassanillu eqqussisinnaanermut periarfississinnaangorlugit inatsisip allanngortinneqarnissaa kissaatigaa.

Innuttaasut siunissami nioqqutissanik namminneq kissaatigisaminnik inatsisit malillugit eqqussisalernissaat tungaviatigut tapersorsoruminarpoq. Akerlianilli imigassamik atuinerulernissaq Naalakkersuisut anguniagarinnigilaat. Taamaammat Naalakkersuisut siunnersuut nunatsinni peqqissutsimut imigassamullu politikimut ataqqinnittumik piviusunngortinneqarnissaa pingaartippaat.

Taamaammat Naalakkersuisut inuit ataasiakkaat nunani allani viinninik imigassanilluunniit nammineerlutik pisisalernerat, ataatsimut isigalugu misinnartumik akikinnerulersitsinninnissaanik siunnersuuteqartup oqarnera isumaqatigaat. Tamanna nunatsinni peqqissutsimut imigassamullu politikimut ajornerulersitsissaaq. Ullumikkut nunatsinni imigassap akia qaffasippoq. Tamanna akitsuutinik pisiniarfiillu iluanaarutaannik patsiseqarpoq. Innuttaasutut nioqqutissat taakku nunani allani pisiarigaanni, nammineq assartuinermut matussusiilluni pisiniarfiit iluanaarutaat sipaarneqarsinnaavoq. Taamaammat siunissami imigassamik akikinnerusumik pissarsisinnaalernermi, siunnersuut imigassamik atuinerulernermit nassataqarsinnaanera ilimanarsinnaavoq.

Inatsisartut siunnersuummik akuersaassappata, imigassalli akiata apparnissaanik aarleqquteqarlutik, tamanna immiaaqqanik, viinninik imigassanillu nammineq eqqussanut

ilassutitut akitsuummik atulersitsinikkut illuatungilerneqarsinnaavoq. Ilassutitut akitsuut taamaattoq nioqutissat nunatsinni pisarineqarsinnaasut, namminerlu nunanit allanit eqqussukat akiata assigiinngissutaanik nalimmassaasinnaavoq.

Innuttaasut siunissami killilersugaanngitsumik immiaaqqanik, viinninik imigassanillu eqqussisinaanermut periarfissaat, qinnuteqaateqariaatsimik, eqqussuinermit akitsuummik akiliisitsisoqarneranik qulakkeerinnittumik peqalernissamik pisariaqartitsissaaq. Qinnuteqaateqartoqarneranik eqqussukkanullu akitsuummik akiliisoqarneranik qulakkeerinnittumik nakkutilliineq pisariaqassaaq. Tamanna maanna nakkutilliisarnermik aqqissuussineq pioreersoq atorlugu passunneqarsinnaassaaq, taamaaliernerli soorunami allaffissornerunermik malitseqassalluni. Taamaammat akileraartarnermut ingerlatsivimmi allaffissornerunermut aningaasartuutininik matussusiisumik, suliamik ingerlatsinermit akiliisitsisoqartarnissaa isumaliutigineqarsinnaavoq.

Qinigaaffik kingullermi inatsisissatut siunnersuummik aalajangiiffigisassatut siunnersuutip uuma arlalitsigut assinganik siunertaqartumik Naalakkersuisuusimasut piareersaapput. Inatsisissatut siunnersuut taanna december 2020-mi tamanut tusarniaassutigineqarpoq. Tusarniaanermi akissutit ataatsimut isigalugu isumaqatiginnipput, tamannalu tunuliaqutaralugu taamanikkut Naalakkersuisuusut siunnersuutip 2021-mi upernaakkut ataatsimiinnermi saqqummiunneqarnissaa akueraat. 2021-mi upernaakkut inatsisartunut qinersisoqartussanngornera pissutigalugu siunnersuut Inatsisartuni suliarineqanngitsoorpoq. Manna aalajangiiffigisassatut siunnersuut akuerineqassappat, Naalakkersuisut siusinnerusukkut inatsisissatut siunnersuutaasoq¹ aallaavigisinnaavaat. Tamanna tunuliaqutaralugu inatsisissatut siunnersuut, siunnersuuteqartup missingiussaaniit minnerussasoq Naalakkersuisut naliliutigaat.

Naggasiullugu inuit immiaaqqanik, viinninik imigassanillu eqqussisalernissaat taamaallaat nammineq atugassaassasoq ilisimatitsissutigineqassaaq. Tuniniaqqitassatut eqqussisarneq imigassallersinnaanermik akuersissuteqarnissamik pisariaqartitsissaaq.

Naggasiullugu Naalakkersuisut aalajangiiffigisassatut siunnersuut oqaatsitsigut paasiuminaatsoqalaartoq erseqqissaatigissavaat. Oqaatsitsigut paasiuminaassutsip siunnersuummi sullinniakkat namminersorlutik inuussutissarsiortuunersut imaluunniit innuttaasuunersut nalorninartippai.

Taamaammat Naalakkersuisut aalajangiiffigisassatut siunnersuut ima qulequtserneqassasoq siunnersuutigaat:

Innuttaasut immiaaqqanik, viinninik imigassallu kimittuunik eqqussisinnaanngornissaat anguniarlugu Nioqutissanik eqqussuineq annissuinerlu pillugit Inatsisartut inatsisaat nr. 18, 30. oktober 1992-imeersumut Naalakkersuisut allannguutissatut siunnersuuteqarnissaannik peqquneqassasut Inatsisartut aalajangiiffigisassaattut siunnersuut

Naalakkersuisut taama oqaaseqarlutik, Naalakkersuisut allannguutissatut siunnersuutaat akuerineqarneqassasoq inassutigaat.

¹ Inatsisissatut siunnersuutaasimasup tusarniaassutaanera uani takuneqarsinnaavoq:
<http://old.naalakkersuisut.gl/kl-GL/Tusarniaaneriit/Tusarniaaneriit-pereersut/2020/Ind-og-udfoersel-varer>